

«Mantegnair ina cuntrada intacta»

Uniu purila grischuna: Radunanza generala

DA GION NUETGN STGIER/ANR

■ **Dapi ier ha l'Uniu purila grischuna in nov president. Thomas Roffler succeda a Hansjörg Hassler, ch'è stà ils davos ultims 12 onns in president fitg activ. Il parsura partent ha fatg ina bilantscha positiva da sia lavur sco il pli «aut» pur grischun. Per l'avegnir giavischa el ina politica agrara che funcziuna.** En ses pled da bainvegni ha il president partent *Hansjörg Hassler* ditg che l'Arena da Cazzas daventia per in di tar ina Arena d'elecziun. Tuttina fetschia el gugent ina bilantscha da ses 12 onns sco president da l'uniun, che reunescha purs e puras da noss chantun. Per el saja quel uffizi stà il pli bel ed interessants da tuts quels numerus uffizis chel haja gù fin ussa. Cun plaschair, satisfaciun e cun corp ed olma saja el stà gugent president da l'Uniu purila grischuna, ha ditg Hansjörg Hassler. Ils preschents han engrazià al pur da Donat cun sa dulzar dals plazs e cun in grond applaus.

Adina damain manaschis purils

Quitads fan tuttina a Hansjörg Hassler che avant bunamain diesch onns aveva il Grischun anc 2785 manaschis purils e da preschent sajan quai anc stgars 2300. Cun far ina cumparaziun cun ils travagls purils en il chantun Berna, che haja radund 11 000 manaschis purils, haja il Grischun bain in bel dumber pi paucs. La situaziun politica instabila sin l'entir mund e l'economia instabila en Svizra fan er gronds quitads a Hansjörg Hassler. Er la tecnologia vegna en il futur a far adina dapli svilup e tenor il president partent èsi gia oz prest uschia che la tecnologia ha il suramaun da l'uman. En l'avegnir hajan ils purs er dad esser pli flexibels ed intensiviar la collavuraziun tranter els, ha Hansjörg Hassler ditg en ses davos pled sco president da l'Uniu purila grischuna. En l'avegnir dastga er betg esser ch'ils manaschis purils hajan adina da vegnir pli gronds per ch'els sapian survivor. Da gronda impurtanza per l'agricultura saja en il futur da mantegnair il schurmetg da cunfins, quai ch'ils purs lessan, dentant la politica e l'industria bain. La produziun saja cunzunt da sa drizzar a la dumonda da la fiera ed ina politica agrara che func-



Ils trais candidats per l'uffizi da president cun il president partent: (da san.) Hans Peter Michel, Hansjörg Hassler, Curdin Capeder e Thomas Roffler.

FOTO G. N. STGIER

ziuna saja indispensabla er ils proxims onns.

L'agricultura ha in bun maletg tar la populaziun

Giast tar la radunanza da l'Uniu purila grischuna è er stà, e quai per l'emprima giada scu cusseglier guvernativ *Jon Domenic Parolini*. El scu er la regenza ed er il cussegl grond sajan persvas chil Grischun dovra ina ferma agricultura. Tar la populaziun haja l'agricultura en general in bun maletg, ha ditg il schef dal departement da l'economia publica. Rinforzar las regiuns, quai saja er en l'avegnir in pensum ed il medem vali per mantegnair ina cuntrada intacta. Il chantun Grischun dovra ina cuntrada intacta ed en quella chaussa prestan ils purs e las puras lavur exemplarica, ha ditg *Jon Domenic Parolini* avant ina imposanta culissa, cun esser l'Arena da Cazzas occupada fin in il davos plaz. Il cusseglier guvernativ ha er engrazià en num da la regenza a Hansjörg Hassler per la buna collavuraziun cun il chantun durant ses 12 onns sco president da l'Uniu purila grischuna, cun stgars 2300 commembers. A pled

è er vegnì a Cazzas *Markus Ritter*, il president svizzer dals purs e cusseglier naziunal. El ha ditg che la lavur cun Hansjörg Hassler saja stada fitg empernaivla, fitg fritgavla ed en quels blers onns haja el adina er ditg ch'il Grischun dovra il turissem dentant il turissem er l'agricultura.

Elecziun plain tensiun

Per la successiun da Hansjörg Hassler èn sa mess a disposiziun trais candidats. Da quels trais purs era *Hans Peter Michel*, l'anterior president dal cussegl grond e l'anterior landamma da Tavau il candidat il pli enconuscent. Cun 61 onns aveva el bain in disvantatg dad esser plitost memia vegl. Il candidat *Thomas Roffler*, il pur da 43 onns e sesent a Grüşch ha cunzunt fatg en il Partenz in num cun esser president da l'uniun purila da la Val. Il terz candidat che vuleva vegnir president dals purs da noss chantun, *Curdin Capeder* era cun 35 onns il pli giuven candidat. A Cazzas è il pur innovativ da Cumbel vegnì sustegnì dad ina gronda delegaziun da l'Uniu purila Surselva. Per tensiun era uschia procurà cun sa metter a disposiziun trais

ferms candidatse trais umens cun in different profil. Tuts trais han gù occasiun da sa preschentar e quai durant tschintg minutas per persvader ils 600 purs da dar la vusch ad in dad els. Fatg la cursa ha lura Thomas Roffler ed obtegnì ha il nov president da l'Uniu purila grischuna en il segund scrutini 331. En l'emprim scrutini avevan tuts trais candidats betg obtegnì la pluralità assoluta da 300 vuschs. Thomas Roffler ha retschet 254 vuschs, Curdin Capeder ha obtegnì 193 vuschs e Hans Peter Michel ha survegnì 152 vuschs. Suenter l'emprim scrutini è alura Hans Peter Michel sa retratg. Ina buna part da sias vuschs èn il segund scrutini alura idas a favur da Thomas Roffler, cun quel far cun 331 vuschs ed a la fin 76 vuschs dapli che ses cuntercandidat Curdin Capeder. Reelegids per la suprastanza da l'Uniu purila grischuna èn vegnids *Peter Allemann*, Vaz sut, *Curdin Capeder*, Cumbel, *Rico Michael*, Andeer, *Rico Lamprecht*, St. Maria, Grüşch, *Daniel Ulber*, Lantsch. Da nov en quel gremium èn vegnids elegids Paul Caduff, Morissen, Andreas Iten, Masein e *Peter Marugg*, Clostra.